

LES VIS

Les Vis, Zaj 1

Lub thaj hlawv tsiaj txi Ntuj.

1 : 1 - 17.

1 1 HUAB TAIS hu Mais Xes tuaj nrog nws tham hauv lub Tsev Tsam Phooj Sib Ntsib, nws hais tias :
2 "Koj hais rau tsoom tub ki His Xas Lais tias : Yog nej leej twg xav cev ib yam rau HUAB TAIS, mas nej yuav muab tsiaj los txi, tsiaj loj tsiaj me los tau.
3 Yog tus twg xav hlawv ib tug tsiaj loj txi Ntuj, mas nws yuav xaiv ib tug phaw uas tsis muaj ib qho xyeej. Nws yuav coj tuaj hlawv ntawm qhov rooj Tsev Tsam Phooj Sib Ntsib, ces HUAB TAIS thiab yuav zoo siab txais. 4 Nws yuav tso nws txhais tes rau saum tus tsiaj taub hau, ces tus tsiaj ntawd thiab li yuav them nws cov txim txhaum. 5 Nws mam li tua tus tsiaj rau HUAB TAIS. As Loos cov tub uas yog cov leej choj, yuav muab cov ntshav txi Ntuj. Lawv yuav muab hliv ywg ib ncig lub thaj txi Ntuj uas nyob ze ntawm lub qhov rooj Tsev Tsam Phooj Sib Ntsib.
6 Ua li ntawd tas, tus tswv tsiaj yuav muab tus tsiaj laws tawv thiab muab txiav ua tej ces.
7 As Loos cov tub, uas yog cov leej choj, yuav nqa hluav taws los rauv saum lub thaj txi Ntuj. 8 Ces As Loos cov tub uas yog leej choj yuav muab cov ces nqaj, lub taub hau thiab cov roj coj mus teeb rau saum cov hluav taws nyob saum lub thaj txi Ntuj. 9 Tus tswv tsiaj yuav muab dej ntxuav tej plab hnyuv thiab tej tes taw, ces tus leej choj yuav coj mus hlawv tas huv tib si rau saum lub thaj. Tus tsiaj hlawv txi Ntuj ntawd yuav yog zoo li ib taig qav ncho pa tsw qab ntxiag mus ua

kom HUAB TAIS lub siab nqig.

10 Yog tus twg xav hlawv ib tug tsiaj me txi Ntuj, ib tug yaj los ib tug tthis, mas nws yuav xaiv ib tug txiv uas tsis muaj chaw xyeej los txi. 11 Nws yuav muab tus tsiaj tua pem qaum thaj txi Ntuj, ntawm HUAB TAIS xub ntiag. Ces As Loos cov tub uas yog cov leej choj yuav muab cov ntshav hliv ncig lub thaj.
12 Tus tswv tsiaj muab tus tsiaj hlais ua tej ces, ces leej choj yuav nqa cov ces ntawd nrog lub taub hau thiab cov roj mus teeb rau saum cov hluav taws uas rauv saum lub thaj.

13 Tus tswv yuav muab dej ntxuav cov plab hnyuv thiab cov tes taw, ces tus leej choj yuav nqa mus hlawv huv tib si saum lub thaj. Tus tsiaj hlawv txi Ntuj no yuav yog ib taig qav ncho pa tsw qab ntxiag mus ua kom HUAB TAIS lub siab nqig.

14 Yog tus twg xav muab noog los hlawv txi Ntuj, mas nws yuav muab ib tug nquab tsug los ib tug nquab lwb rwg.

15 Leej choj yuav nqa tus nquab mus saum lub thaj txi Ntuj, nws yuav zawm nquab caj dab, ces nws dam lub taub hau los hlawv kom ncho pa saum lub thaj txi ntuj. Nws tsi cov ntshav los pleev ib sab ntawm lub thaj. 16 Nws de lub txia thiab dob cov plaub rau hauv lub tais cug cov tshauv xyaw roj uas nyob sab hnub tuaj ntawm lub thaj. 17 Nws muab tus noog phua ob sab, ib sab nrog ib phab tis, tiam sis nws tsis txiav kom tu nrho. Tus leej choj mam li muab tus noog hlawv saum lub cub tawg uas nyob saum lub thaj txi Ntuj. Tus tsiaj hlawv txi Ntuj li no yuav yog ib taig qav ncho pa tsw qab ntxiag mus ua kom HUAB TAIS zoo siab.

Thaj txi Ntuj cev qoob loo.

2 : 1 - 7.

2 1 Yog leej twg muab qoob loo los txi rau HUAB TAIS, mas nws yuav muab ib co hmoov nplej, nws hliv roj rau thiab nphoo hmoov xyab rau saud.

2 Nws yuav nqa cov hmoov nplej ntawd tuaj rau As Loos cov tub uas yog cov leej choj. Nws yuav tsuab ib phoov tes hmoov nplej xyaw roj thiab xyaw hmoov xyab cev rau leej choj kom coj mus hlawv saum lub thaj txi Ntuj, ua ib roog qav ncho pa lug mus ua kom HUAB TAIS siab nqig. 3 Qhov seem, yuav muab rau As Loos thiab nws cov tub, vim yog ib qho seem ntshiab huv ntawm HUAB TAIS rooj qav.

4 Yog koj xav muab cov ncuav ci hauv qhov txos los cev txi Ntuj, mas koj yuav ntse hmoov nplej xyaw roj thiab puab ncuav tsis xyaw poov xab, los koj yuav xub puab ncuav tsis xyaw poov xab, koj mam li pleev roj rau kuj tau.

5 Yog koj muab cov ncuav ci saum daim hlawv los cev txi Ntuj, mas koj yuav muab hmoov nplej ntse xyaw roj puab tsis xyaw poov xab. 6 Koj yuav muab ntais ua tej daim, mam muab roj ywg rau. Qhov no yog tus kev cai cev qoob loo txi Ntuj.

7 Yog koj muab cov ncuav ci hauv tais los cev txi Ntuj, mas koj yuav muab cov hmoov nplej do xyaw roj puab.

Thaj txi Ntuj uas yus noj tau cov txim. 3 : 1 - 5 + 17.

3 1 Yog leej twg xav ua ib thaj txi Ntuj noj cov txim, mas nws yuav tua ib tug tsiaj loj, txiv los maum kuj tau, tus tsiaj yuav tsum tsis txhob muaj ib qho xyeej. Nws yuav cev txi rau HUAB TAIS. 2 Nws yuav tso nws txhais tes rau

saum tus tsiaj taub hau, thiab yuav tua tus tsiaj nyob ntawm lub qhov rooj Tsev Tsam Phooj Sib Ntsib. Ces As Loos cov tub uas yog cov leej choj yuav muab cov ntshav ywg ncig lub thaj. 3 Nws yuav muab tej yam no ntawm tus tsiaj noj txim mus hlawv ua ib rooj qav rau HUAB TAIS : xws li cov roj uas lo ntawm cov plab hnyuv thiab daim roj npog cov plab hnyuv, 4 ob lub raum, cov roj uas lo rau ob sab ntsag, daim roj uas lo rau thooj siab thiab ob lub raum.

5 As Loos cov tub yuav muab tej no hlawv saum lub thaj, ntxiv cov txim hlawv saum lub cub tawg. Ces yuav yog ib taig qav ncho pa tsw qab mus ua kom HUAB TAIS siab nqig.

17 Qhov no yog ib txog cai rau nej tsoom xeeb ntxwv coj mus ib txhis tsis muaj caij kawg, txawm nej yuav nyob teb chaws twg los nej yuav caiv tsis noj roj tsis noj ntshav li.

Xaus cov kab ke txi Ntuj.

7 : 37 - 38.

7 37 Qhov hais los no yog cov kab ke ua thaj txi Ntuj hlawv tsiaj, thaj txi Ntuj cev qoob loo, thaj txi Ntuj ntxuav txhaum, thaj txi Ntuj them txim, thaj txi Ntuj tsa leej choj thiab thaj txi Ntuj noj cov txim. 38 Ua raws li HUAB TAIS hais rau Mais Xes saum roob Xis Nais, hnub uas HUAB TAIS qhia kom cov His Xas Lais txi HUAB TAIS nyob hauv lub hav suab puam Xis Nais.

Cov kab ke tsa leej choj.

8 : 1 - 23 + 30 - 32.

8 1 HUAB TAIS hais rau Mais Xes tias :

2 "Koj coj As Loos thiab nws cov tub

tuaj, koj nqa cov ris tsho, cov roj pleev taub hau, tus nyuj them txhaum, ob tug laug tthis, thiab lub tawb ncuav mov tsis xyaw poov xab. 3 Koj hu tsoom pej xeem huv tib si tuaj nyob ntawm qhov rooj Tsev Tsam Phooj Sib Ntsib."

4 Mais Xes ua raws li HUAB TAIS tau hais, ces tas tsoom pej xeem tuaj sib txoos nyob ntawm lub qhov rooj Tsev Tsam Phooj Sib Ntsib. 5 Mais Xes hais rau lawv tias :

"HUAB TAIS ceeb toom kom peb ua li no !"

6 Ces Mais Xes hu As Loos thiab nws cov tub kom txav los, nws muab dej ntxuav lawv. 7 Nws muab lub tsho ntev rau As Loos hnav, muab txoj siv rau nws sia, muab lub tsho tshaj sab rau nws hnav tuaj saud, thiab muab lub tsho teev Ntuj rau nws npua. Ces nws muab txoj siv pav lub tsho teev Ntuj rau ntawm As Loos duav. 8 Nws muab daim npog hauv siab rau As Loos coj, muab ob txwm kuam hu ua Yus Lis thiab Tus Mis tso rau hauv daim npog hauv siab. 9 Nws muab ib txoj phuam rau As Loos ntoo, nws rhais ib lub paj kub rau saum txoj phuam ncaj ntawm hauv pliaj. Yog lub cim ua leej choj raws li HUAB TAIS qhia kom Mais Xes ua.

10 Ces Mais Xes muab roj pleev lub Tsev Nyob thiab tas puas tsav yam toob xib nyob hauv, nws muab lub Tsev Nyob fij rau HUAB TAIS. 11 Nws pov dej xya zaus rau saum lub thaj txi Ntuj, thiab nws muab roj pleev lub thaj thiab pleev cov twj saum lub thaj, pleev lub rhaww rau dej thiab lub taw rhaww, nws muab lub thaj fij rau HUAB TAIS. 12 Ces Mais Xes hliv roj rau saum As Loos taub hau, nws pleev roj fij As Loos rau HUAB TAIS.

13 Mais Xes hu As Loos cov tub kom

txav los ze, nws muab tsho ntev rau lawv hnav, muab siv rau lawv sia, thiab nws muab ib co kaus mom rau saum lawv taub hau, raws li HUAB TAIS qhia kom Mais Xes ua.

14 Mais Xes kom lawv cab tus nyuj ntxuav txhaum los. As Loos thiab nws cov tub tso lawv txhais tes rau saum tus nyuj taub hau, 15 ces Mais Xes muab tus nyuj tua. Mais Xes xuas ntiv tes tub nyuj cov ntshav los pleev cov kub uas nyob ntawm plaub ceg kaum thaj txi Ntuj, kom ntshav ntxuav cov kub ntawd tej qhov tsis huv. Nws muab ib qho ntshav los hliv rau hauv lub taw thaj txi Ntuj. Nws ua kab ke ntxuav txhaum saum lub thaj, vim nws yuav muab lub thaj fij rau HUAB TAIS.

16 Thaum nws ua tas, nws laws cov roj qhwv cov plab hnyuv, cov roj ntawm thooj siab, nws hlais ob lub raum thiab cov roj puab ob lub raum, nws muab coj mus hlawv ncho pa lug rau saum lub thaj txi Ntuj. 17 Daim tawv nyuj, cov nqaij nyuj, thiab cov quav mas Mais Xes coj mus hlawv sab nraum lub yeej raws li HUAB TAIS kom ua.

18 Mais Xes kom lawv cab tus tthis uas yuav muab hlawv txi Ntuj los. As Loos thiab nws cov tub tso lawv txhais tes rau saum tus tthis taub hau, 19 ces Mais Xes muab tus tthis tua. Mais Xes muab cov ntshav ywg ib ncig lub thaj. 20 Nws muab tus tthis txiav ua tej ces, nws muab lub taub hau, nrog cov ces thiab cov roj hlawv ncho pa lug. 21 Nws muab dej ntxuav cov plab hnyuv thiab cov tes taw, ces nws coj mus tso xyaw tus tthis lub cev, nws muab hlawv ua ke. Yog ib tug tsiaj hlawv txi kom HUAB TAIS lub siab nqig, thiab yog ib phaj qav ncho pa rau HUAB TAIS hnja, raws li HUAB TAIS hais rau Mais Xes.

22 Mais Xes tseem kom lawv cab lwm tus tshis los, yog tus tshis ua thaj txi Ntuj tsa leej choj. As Loos thiab nws cov tub tso lawv txhais tes rau saum tus tshis taub hau, 23 ces Mais Xes muab tua. Mais Xes tub ib qho ntshav los pleev As Loos daim nplooj ntseg xis, pleev As Loos tus ntiv tes xoo xis thiab pleev nws tus ntiv taw xoo xis.

30 Ua tas, mas Mais Xes muab roj thiab muab cov ntshav uas nyob saum lub thaj txi Ntuj tsuag As Loos thiab As Loos cov ris tsho, nws muab tsuag rau As Loos cov tub thiab lawv cov ris tsho huv tib si. Nws muab As Loos thiab nws cov ris tsho fij rau HUAB TAIS, nws muab As Loos cov tub thiab lawv cov ris tsho cev rau HUAB TAIS li ntawd.

31 Ces Mais Xes hais rau As Loos thiab nws cov tub tias :

"Nej muab cov nqaij hau kom siav nyob ntawm lub qhov rooj Tsev Tsam Phooj Sib Ntsib. Nej yuav noj cov nqaij thiab cov ncuav mov hauv lub tawb rau cov ncuav txi Ntuj tsa leej choj nyob ntawd, raws li kuv tau hais rau nej tias : 'As Loos thiab nws cov tub yuav noj cov ncuav mov no.' 32 Nej noj mov noj nqaij tas, nej muab cov mov thiab cov nqaij seem hlawv."

Cov tsiaj huv thiab tsis huv.

11 : 1 - 8.

11 1 HUAB TAIS hais lus rau Mais Xes thiab As Loos nkawd tias :

2 "Neb hais rau tsoom tub ki His Xas Lais tias : Tas cov tsiaj nyob nruab nqhuab mas nej noj tau cov zoo li no : 3 hom tsiaj twg uas txhais taw muaj rau thiab faib ua ob tug rau thiab nws zom zaub, mas nej thiaj noj tau. 4 Cov tsiaj zom zaub muaj ob tug rau

taw uas nej noj tsis tau mas tsuas muaj li no : Nej yuav saib tus ntxhuav yog ib tug tsiaj tsis huv, nws yog tsiaj zom zaub, tab sis nws tus rau taw tsis faib ua ob tug rau.

5 Nej yuav saib tus nas ntxhw yog ib tug tsiaj tsis huv, nws yog tsiaj zom zaub, tiam sis nws tsis muaj ob tug rau taw.

6 Nej yuav saib tus luav yog ib tug tsiaj tsis huv, txawm nws yog tsiaj zom zaub, los nws tus rau taw tsis faib ua ob tug.

7 Nej yuav saib tus npua yog ib tug tsiaj tsis huv, nws muaj ob tug rau taw tiam sis nws tsis zom zaub. 8 Nej yuav tsis txhob noj cov tsiaj ntawd tej nqaij, tsis txhob kov cov qauv li, nej yuav saib lawv yog tsiaj tsis huv.

Cov neeg mob ruas.

13 : 1 - 2 + 45 - 46.

13 1 HUAB TAIS hais rau Mais Xes thiab As Loos nkawd tias :

2 "Yog ib tug neeg daim tawv xoo pob, voos kiav txhab, los tej tawv nqaij pheej txaij, mas yuav ceev faj tsam yog mob ruas. 45 Yog ib tug neeg mob ruas lawm, mas nws yuav tsum hnav tej ris tsho khaub hlab, cia plaub hau ntxhov, nws yuav npog nws sab di ncauj saud, thiab nws yuav qw tias :

'Tsis huv! Tsis huv!'

46 Nws mob ntev li cas, mas nws tsis huv ntev li ntawd, vim nws tsis huv, mas nws yuav nyob twm zeej, nws yuav tsum tawm mus nyob sab yeej nraud."

Kev cai txuag tej yam ntshiab.

17 : 1 - 6 + 10 - 16.

17 1 HUAB TAIS hais rau Mais Xes tias :

2 "Koj hais rau As Loos, rau nws cov tub thiab rau tas tsoom tub ki His Xas Lais

tias : HUAB TAIS tau ceeb toom li no :
 3 Txhua tus neeg hauv haiv His Xas Lais, tus nyob sab yeej hauv, thiab tus nyob sab yeej nraud huv tib si, yog nws tua nyuj, tua yaj los tua tthis txi Ntuj,
 4 nws tsis coj los tua ntawm lub qhov rooj Tsev Tsam Phooj Sib Ntsib, ze ntawm HUAB TAIS qhov chaw nyob, mas tus ntawd yuav tsum ris cov ntshav uas tau nchuav ntawd, ces nws yuav raug ntiaib tawm hauv nws haiv neeg mus.

5 Li ntawd, cov His Xas Lais yuav tsum coj cov tsiaj uas lawv xav tua txi Ntuj tuaj rau leej choj txi rau HUAB TAIS nyob ntawm lub qhov rooj Tsev Tsam Phooj Sib Ntsib. Lawv yuav ua raws li ib thaj txi Ntuj noj cov txim. 6 Leej choj yuav muab cov ntshav hliv rau saum HUAB TAIS lub thaj uas nyob ntawm lub qhov rooj Tsev Tsam Phooj Sib Ntsib. Nws yuav muab cov roj hlawv ncho pa mus rau HUAB TAIS, kom nws lub siab nqig.

10 Txhua leej txhua tus hauv cov yim neeg His Xas Lais, los txhua tus qhua tuaj nyob hauv nej, yog leej twg noj ntshav, tsis hais ntshav dab tsi, mas kuv yuav tawm tsam ntaus nws, vim nws tau noj ntshav, ces kuv yuav ntiaib nws tawm hauv kuv haiv neeg mus. 11 Vim cev nqaij txoj sia yog cov ntshav. Cov ntshav ntawd kuv muab rau nej ua kab ke them txim txhaum nyob saum lub thaj txi Ntuj kom cawm tau nej txoj sia, vim kawg yog ntshav thiab them tau txim txhaum, thiab cawm tau ib txog sia.

12 Vim li ntawd, kuv hais rau tsoom His Xas Lais tias : 'Nej yuav tsis txhab noj ntshav li, tus qhua uas tuaj nyob hauv nej los yuav tsis txhab noj ntshav.' 13 Nej leej twg, tsis hais tus His Xas Lais los tus qhua uas tuaj nyob hauv nej, yog nws mus yos hav zoov tua tau nqaij, txawm yog tsiaj los xij noog los xij uas nws noj

tau, nws yuav tsum muab cov ntshav hliv pov tseg thiab muab av los npoog rau.
 14 Vim txhua yam nqaij txoj sia yog nws cov ntshav, kuv thiab hais rau tsoom His Xas Lais tias : 'Nej yuav tsis txhab noj ib qho ntshav dab tsi li, vim txhua yam nqaij txoj sia yog nws cov ntshav, leej twg noj ntshav yuav raug ntiaib tawm mus.'

15 Nej leej twg, txawm yog tus pej xeem los tus qhua, yog nws noj ib tug tsiaj tuag los ib tug tsiaj raug lwm tus tsiaj tom tuag, mas nws yuav tsum ntxhua nws cev khaub ncaws thiab yuav tsum muab dej los ntxuav nws, nws yuav tsis huv txwm hnub ntawd txog tsaus ntuj, ces nws mam rov huv tuaj. 16 Tiam sis yog nws tsis ntxhua nws cov khaub ncaws thiab tsis ntxuav nws lub cev, mas nws yuav ris lub nra txhaum.

Txoj kev ua neeg zoo.

19 : 1 - 2 + 17 - 18.

19 1 HUAB TAIS hais rau Mais Xes tias :

2 "Koj yuav hais rau tsoom tub ki His Xas Lais tias :

Nej yuav ua neeg ntshiab, vim kuv yog nej tus HUAB TAIS, nej tus Tswv Ntuj, kuv yog Tus Ntshiab.

17 Koj yuav tsis txhab ntxub koj tus kwv tij nyob hauv koj nruab siab. Koj yuav qhuab qhia tus uas nrog koj ua ib haiv neeg, koj thiab yuav tsis tau ris nws qhov txhaum. 18 Koj yuav tsis txhab rob caub thiab yuav tsis txhab chim ntev rau tus uas nws yog koj haiv neeg.

Koj yuav nyiam tus nyob ze koj ib yam li koj nyiam koj. Vim kuv yog HUAB TAIS.

Kab ke nqaum paj nqaum nruas ua Hmoov Hla. 23 : 1 + 4 - 8.

23 1 HUAB TAIS hais rau Mais Xes
hais tias :

4 HUAB TAIS cov hnub nyog nqaum paj nqaum nruas yog tej lub txoos ntshiab. Thaum txog caij txog nyog, mas nej yuav hu cov His Xas Lais tuaj sib txoos ua ke, raws li no : 5 Lub ib hlis, xiaab kaum plaub tsaus ntuj, yog Hmo Hla uas nej yuav muab qee rau HUAB TAIS.

6 Lub hlis ntawd tim kaum tsib, yog hnub nco txog cov mov tsis xyaw poov xab ; nej yuav noj mov tsis xyaw poov xab xya hnub sib law. 7 Thawj hnub, nej yuav sib sau ua lub txoos ntshiab, nej yuav tsis txlob ua ib yam hauj lwm hnyav li. 8 Xya hnub sib law, nej yuav niaj hnub txi ib pluas qav rau HUAB TAIS. Hnub xya, yog hnub sib sau ua lub txoos ntshiab dua, nej yuav tsis txlob ua ib yam hauj lwm hnyav li.

Cev thawj cov qoob tshiab txi Ntuj.
23 : 9 - 11.

9 HUAB TAIS hais rau Mais Xes tias :

10 "Koj hais rau Tsoom tub ki His Xas Lais tias : Thaum nej mus txog lub teb chaws uas kuv muab rau nej nyob, nej cog qoob loo siav, nej sau, mas nej yuav nqa thawj tes nplej tuaj rau tus leej choj.

11 Leej choj yuav muab cev rau HUAB TAIS kom nws saib nej xis nws siab. Hnub lawv qab Xas Npas Tos, mas leej choj yuav cev cov qoob tshiab ntawd rau Ntuj.

Kab ke nqaum paj nqaum nruas
Hnub Nyoog Tsib Caug.
23 : 15 - 16.

15 Txij hnub lawv qab xas npas tos uas nej tuaj cev thawj rev nplej txi Ntuj, nej yuav suav xya lub lis piám txwm nkaus.

16 Nej yuav suav tsib caug hnub, txog hnub lawv qab xas npas tos dua, ces nej rov qab nqa dua ib co qoob loo tuaj ua dua cov kab ke cev qoob loo txi Ntuj rau HUAB TAIS."

Hnub them txim txhaum.

23 : 26 - 32.

26 HUAB TAIS hais rau Mais Xes tias :

27 "Lub xya hli xiab kaum, yog hnub them txim txhaum. Nej yuav sib sau ua lub txoos ntshiab. Nej yuav yoo mov thiab nej yuav hlawv ib phaj qav txi HUAB TAIS. 28 Hnub ntawd, nej yuav tsis txlob ua ib yam hauj lwm dab tsi li, vim hnub ntawd yog hnub them txim txhaum, uas luag ua kab ke them txim txhaum rau nej nyob ntawm nej tus HUAB TAIS Tswv Ntuj xub ntiag.

29 Kuv hais tseeb, yog leej twg tsis yoo mov hnub ntawd, mas nws yuav raug ntiab tawm hauv nws tsev neeg mus.

30 Yog leej twg ua ib yam hauj lwm hnub ntawd, mas kuv yuav ua kom nws ploj hauv nws haiv neeg mus. 31 Nej yuav tsis txlob ua ib yam hauj lwm dab tsi li, yog ib txog cai rau nej tsoom xeeb ntxwv coj mus ib txhis, txawm nej nyob lub teb chaws twg, los nej yuav tsum coj.

32 Hnub ntawd yog ib hnub uas nej yuav tsum so tiag. Nej yuav yoo mov, pib yoo hnub xiab cuaj lub hli ntawd, txij yav tsaus ntuj mus txog hnub xiab kaum tsaus ntuj, nej yuav tso hauj lwm tseg huv tib si."

Nco txog cov tsev tsam phooj.
23 : 33 - 38.

33 HUAB TAIS hais rau Mais Xes tias :

34 "Koj hais rau cov tub ki His Xas Lais tias : Lub xya hli tim kaum tsib, nej yuav

pib ua HUAB TAIS cov kab ke nco txog cov Tsev Tsam Phooj xya hnub. 35 Thawj hnub, nej ua lub txoos ntshiab, nej yuav tsis txob ua ib Yam hauj lwm hnyav li. 36 Nej yuav niaj hnub hlawv ib phaj qav txi HUAB TAIS puv xya hnub sib law. Hnub yim, nej yuav sib sau ua lub txoos ntshiab, nej yuav hlawv ib phaj qav txi HUAB TAIS. Hnub nej sib sau ua ke, nej yuav tsis txob ua ib Yam hauj lwm hnyav.

37 Cov hnub nyog no yog hnub nyog qee cia nco txog HUAB TAIS, mas nej yuav hu cov His Xas Lais tuaj sib sau ua lub txoos ntshiab, hlawv tej phaj qav txi HUAB TAIS, hlawv tsiaj txi Ntuj, cev qoob loo txi Ntuj, ua thaj txi Ntuj noj cov txim, hliv dej hliv cawv txi Ntuj, raws li nyias tej kab ke kav nyias lub hnub nyog. 38 Nej yuav txi Ntuj ua cov ntees nqaum paj nqaum nruas no rau HUAB TAIS ntxiv rau cov hnub xas npas tos huv tib si, thiab tseem ntxiv rau tej hnub uas nej tuaj yeem xav cev paj tshab rau Ntuj, thiab xav ua Ntuj tsaug, los xav pauj tej lub yeem rau HUAB TAIS.

Lub xyoo xas npas tos.

25 : 1 - 17.

25 1 HUAB TAIS hais rau Mais Xes saum lub roob Xis Nais hais tias : 2 "Koj hais rau tsoom tub ki His Xas Lais tias : Thaum nej mus txog lub teb chaws uas kuv muab rau nej nyob lawd, mas tej av yuav tsum so ib xyoos xas npas tos cia hwm HUAB TAIS. 3 Koj yuav cog noob qoob noob loo rau xyoo hauv koj daim teb, koj yuav tav koj cov hmab txiv cawv rau xyoo, thiab koj yuav sau qoob rau xyoo. 4 Tab sis thaum txog Xyoo Xya, mas tas lub teb chaws, tej av yuav so ib xyoos xas npas tos hwm

HUAB TAIS. Koj yuav tsis cog noob qoob rau hauv koj daim teb thiab koj yuav tsis tav koj cov hmab txiv cawv li. 5 Koj yuav tsis hlais cov ntxaib nplej uas koj tsis tau cog, thiab koj yuav tsis de cov txiv cawv saum cov hmab uas koj tsis tau tav. Yog xyoo rau av so. 6 Xyoo Xya, cia av so xyoo xas npas tos, mas koj yuav siv tas puas tsav Yam uas tuaj hauv nruab teb ua txhiam xws rau koj, rau koj tus tub txib, tus ntxhais txib, koj tus tub zog, tus qhua tuaj so hauv koj tsev, rau tas txhua leej txhua tus uas nyob hauv koj tsev tib si. 7 Koj cov tsiaj thiab tas cov tsiaj hauv lub teb chaws los yuav noj tej Yam uas tuaj hauv nruab teb tib si thiab.

Xyoo hom khaj lom zem.

25 : 8 -17.

8 Koj yuav suav xya ntu xya xyoo, uas yog xya zaus xya xyoo, Yam li plaub caug cuaj xyoos. 9 Thaum txog lub xya hli xiab kaum, koj yuav tshuab hom nrov. Hnub them txim txhaum, mas tas lub teb chaws yuav tshuab hom nrov nrov. 10 Nej yuav muab xyoo tsib caug ua Xyoo Ntshiab. Nej yuav tshaj rau cov neeg nyob hauv lub teb chaws tias sawv daws dim ntawm txoj kev ua qhev. Yog ib lub caij rau nej sawv daws hom khaj : nej nyias yuav rov mus nyob hauv nyias lub tsev, nyias yuav rov mus nyob hauv nyias lub xeem. 11 Xyoo tsib caug yuav yog ib xyoos nej hom khaj dhia daj dhia luag : Nej yuav tsis tseb noob qoob noob loo, nej yuav tsis sau cov nplej uas nej tsis tau cog, nej yuav tsis de txiv cawv saum cov hmab uas nej tsis tau tav ntsis. 12 Vim yog ib xyoos hom khaj dhia daj dhia luag, yog ib Xyoos Ntshiab. Mas nej yuav noj tej txhiam xws uas tuaj nruab teb.

13 Xyoo hom khaj ntawd, mas nej nyias yuav rov mus nyob hauv nyias tsev.

14 Yog koj muag ib yam dab tsi rau ib tug neeg hauv koj lub teb chaws, los koj muas dab tsi ntawm nws los, mas yuav tsis txhob muaj ib tug noj paj ntawm nws tus kwv tij. 15 Koj yuav suav saib lub xyoo hom khaj dhau tau pes tsawg xyoo lawm, ces koj yuav them tus nqi muas raws li ntawd. Tus muag rau koj kuj yuav suav saib yuav sau tau pes tsawg cim qoob, ces nws yuav hais tus nqi rau koj them raws li ntawd. 16 Yog tseem

tshuav ntau xyoo, mas tus nqe yuav kim, yog tshuav tsawg xyoo, mas tus nqe yuav pheej yig, vim tias nws yuav xam saib nws muag pes tsawg cim qoob rau koj. 17 Nej ib leeg yuav tsis txhob dag ib leeg noj. Nej yuav ntshai Tswv Ntuj, vim kuv yog nej tus HUAB TAIS Tswv Ntuj.

18 Nej ua raws li kuv cov cai lij choj thiab nej mloog kuv tej kev cai mog. Nej ua raws kuv cov cai lij choj, ces nej yuav nyob nyab xeeb hauv lub teb chaws.

19 Tej av yuav txi txiv, nej yuav tau noj txaus siab, thiab nej yuav tau nyob nyab

xeeb hauv lub teb chaws. 20 Nej hais tias : "Yog peb tsis tseb noob qoob noob tsa thiab tsis sau qoob sau loo, mas peb yuav muab dab tsi los noj Xyoo Xya ?"

21 Nej nco ntsoov tias Xyoo Rau, kuv yuav tsuag kuv lo lus foom hmoov zoo rau nej, ces Xyoo Rau nej yuav tau qoob loo txaus noj peb xyoos. 22 Thaum txog Xyoo Yim, nej rov tseb nplej, nej tseem noj cov qoob uas nej sau Xyoo Rau tsis tau tas, nej tseem yuav noj mus txog Xyoo Cuaj, nej yuav noj cov qoob qub mus txog thaum cov qoob tshiab siav.

**Tswv Ntuj cov lus foom hmoov
zoo. 26 : 3 - 13.**

26 3 Yog nej coj raws li kuv cov kev cai lij choj, yog nej khaws kuv tej lus qhuab lus qhia thiab ua raws nraim li ntawd, 4 mas kuv yuav ua kom nag los rau nej raws caij raws nyog kom txaus nej siv, tej av yuav ntsu qoob, tej ntoo yuav txi txiv ncw ncw.

5 Yuav muaj nplej rau nej ntaus hauv lub tshav ntaus nplej mus txog lub caij de txiv cawv. Nej yuav de txiv cawv mus txog lub caij tseb nplej. Nej yuav muaj mov txaus noj, thiab nej yuav tau nyob nyab xeeb hauv nej lub teb chaws.

6 Kuv yuav xa kev thaj yeeb tuaj rau lub teb chaws, ces nej yuav pw tsaug zog, tsis muaj leej twg yuav tuaj ua kom nej txhawj. Kuv yuav ua kom tej tsiaj nyaum ploj hauv nej lub teb chaws mus. Kuv yuav tsis pub ib rab ntaj tuaj hauv nej lub teb chaws. 7 Nej yuav caum nej cov yeeb ncuab, thiab nej cov ntaj yuav ua lawv vau tas. 8 Nej tsib leeg yuav caum yeej lawv ib puas leej, nej ib puas leej yuav caum yeej lawv kaum txhiab leej, nej cov ntaj yuav ua nej cov yeeb ncuab vau tas.

9 Kuv yuav tig ntsej muag rau nej, kuv yuav ua kom nej coob thiab huam vam. Kuv yuav khaws lo lus kuv tau nrog nej cog cia nyob mus li tsis rhuav. 10 Nej noj ib cim qoob, nej yuav tsum thau cov qoob laus rau nraum zoov, nej thiaj yuav tau chaw ntim cov qoob tshiab.

11 Kuv yuav tsa tsev nyob nruab nrab nej, kuv yuav tsis tso nej pov tseg.

12 Kuv yuav nrog nej nyob, kuv yuav ua nej tus Tswv Ntuj, nej yuav ua kuv haiv neeg. 13 Kuv yog nej tus HUAB TAIS, nej tus Tswv Ntuj, yog tus coj nej tawm Hais Nkws Tos teb los, kom nej tsis txhob tau ua luag qhev ntxiv. Kuv dam nej rab quab pov tseg, kuv ua kom nej tsa taub hau siab mus kev.